

Booshi Wever di UPP

Hardrock Hotel ainda no ta “rond”

ORANJESTAD – Booshi Wever, lider di Union Patriótico Progresista, a comenta riba un carta fecha 30/06/14 di sr. Jan de Ruijter na diferente instancia cu ta hiba na un serie di pregunta pa Otmar Oduber como minister di turismo riba e situacion di Hardrock Hotel, cu ainda no ta rond.

Di parti di e partido, Wever a expresa cu nan lo aprecia su contestacion dentro di 2 siman, en bista di e supuesto deadline pa Southwest.

Manipulacion

Den e comunicado di Wever a emiti, ta ilustra riba e di dos indicacion di manipulacion, c.q. fraude, c.q. corrupcion, ta na unda permiso a wordo duna na famia Croes di Southwest Horeca Development pa inmediatamente cuminsa “shop around” cu e acuerdonan/palabracionnan cu Gobierno encuanto e terreno of e opcion eyriba, y cu e permisonan pa operacion di hotel y casino, pa e suma di 10 milyon dollar, of na e compania cu kier paga e suma mas halto, sin ningun intencion pa nan mes, esta Southwest, ta, of bira un accionista, of un doño den e proyecto (ultimate beneficiary owner – UBO).

E ta sigui bisa: “Den un di su comunicadonan anterior ya caba sr. de Ruijter a elabora riba esaki.

Si e maniobranan aki no ta hole fraude y corrupcion, anto ta kico SI!

12). Sr. Oduber ta di acuerdo cu nos cu e hecho cu e NO a denuncia sr. de Ruijter riba e acusacionnan aki, c.q. cu sr. Oduber NO a haya rason den esaki dilanti Hues, ta un prueba cu di berdad (taba)tin manipulacion, c.q. fraude, c.q. corrupcion den e proyecto en cuestion?

No tin experiencia

Otro indicacion cu sr. de Ruijter a duna di manipulacion, c.q. fraude, c.q. corrupcion, ta ora cu – no obstante e hecho cu Southwest Horeca Development no tin ningun experiencia whatsoever den e “resort hotel business”, pero tampoco ningun experiencia (“track record”) den desaroyo di hotel – toch gobierno ta permiti Southwest desaroya un proyecto di hotel y casino di 4 strea, cu ta encera un inversion di 120 milyon dollar, pero riba cual ta paga un capital inicial di unicamente 10.000 florin Arubano (menos cu US\$ 6,000,00!).

Esaki ta un areglo escandaloso, pero tipico di un gobierno

cu solamente interesnan di “friends and family” den nan mente, na luga di tin na pecho e interes general y bienestar di nos isla y su ciudadanonan. 13). Sr. Oduber ta di acuerdo cu nos cu e suma di e capital inicial di Afls. 10.000,00 riba un inversion di US\$ 120.000.000,00 ta lanta sospecho di mas manipulacion, c.q. fraude, c.q. corrupcion?

Lasonan di amistad

Ta obvio cu e probabel corrupcion den e proyecto Hard Rock ta danki na e lasonan di amistad estrecho entre un minister anterior di turismo, esta Tico Croes, y esun actual Otmar Oduber, locual ta splica tambe pakico ya for di un inicio Tico Croes como minister di Turismo y su coordinador Otmar Oduber, lo mester a “konkel” y manipula pa famia Croes/Southwest haya e derechonan pa desaroya un proyecto di un hotel y casino na e sitio unda Hotel Bushiri tabata situa.

Ta for di e tempo ey e grupo di famia Croes lo mester tabata gosa di cierto privilegio- y beneficiaran inhuisto y ilegal, cu finalmente mester a resulta den e hecho cu e comision di evaluacion (pa reitera: di cua mayoria supuestamente tabata peonnan di Otmar) awor – un bes mas mediante manipulacion – ta

otorga e proyecto na e compania di famia Croes!

Prueba

Manera ta conoci, na diferente ocasion sr. de Ruijter a mustra riba e probabel corrupcion; di mesun manera el a adverti instancianan concerni; pero, manera ta custumber, instancianan ta “huiverig” tanten cu no tin prueba. Wel, awor e propio Otmar Oduber a presenta e pruebanan, aunke riba instruccion di sr. hues.

Lo no keda nos nada straño si den e proximo dia- of siman- nan nos tende e noticia cu sr. de Ruijter a denuncia e manipulacionnan aki na Ministerio Publico; ta di spera e ora ey cu esaki lo tuma accion y lo investiga e asunto for di su inicio.

Compania perhudica

No ta “vergezocht” tampoco pa adverti riba e posibilidad cu e compania cu a wordo perhudica, esta Global Destinations, lo por cuminsa un caso contra gobierno, si e mester haya e documentonan den su poder.

14). Sr. Oduber por informanos si Global Destinations por a notifica gobierno di ta



Booshi Wever di UPP

bay cuminsa un caso en conexion cu otorgamento inhuisto di e proyecto na Southwest?

15). Den caso afirmativo, Sr. Oduber por informa nos si e caso aki ta encera un demanda pa daño y perjuicio, y cuanto ta e suma cu Global a demanda?

Contesta riba pregunta

Partido Union Patriótico Progresista – U.P.P. ta desea di haya e contestanan por escrito lo mas pronto posibel; teniendo cuenta cu supuestamente e compania Southwest lo a haya un otro deadline, nos ta spera di por ricibi e contestanan aki dentro di 2 siman, y ta gradici sr. Oduber pa su diligencia den esaki.” □